

3145/2232.83

7

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
DEC 12 1959

禹州志卷之八

塔佛大學漢和
圖書館珍藏印

人物

后妃 公主 列女

后妃

漢

宏農王妃唐姬潁川人山東義兵大起誅董卓卓令
郎中李儒進酖曰服此藥可以辟惡王曰我無疾是
欲殺我耳不肯飲強飲之不得已乃與妻唐姬及宮
人飲讌別王謂姬曰卿王者妃勢不復為吏民妻自

愛從此長辭遂飲藥而死時年一十八歲王薨歸鄉里父會稽太守瑁欲嫁之姬誓不許及李傕破長安遣兵抄關東畧得姬傕因欲妻之固不聽而終不自名尚書賈詡知之以狀白獻帝帝聞感愴乃下詔迎姬置園中使侍中持節拜爲宏農王妃

申貴人潁川人濟北惠王壽母世吏二千石貴人年十三入掖庭壽以永平二年封分太山郡爲國和帝遵肅宗故事兄弟皆留京師息寵篤至有司請遣諸王歸藩不忍許之及帝崩乃就國永初元年鄧太后封壽舅申轉爲新亭侯見北史

程夫人獻帝夫人見漢書

晉

康帝后褚氏名蒜子陽翟人哀之女穆帝卽位幼冲蔡謨等請臨朝稱制帝旣冠歸政居崇德宮及哀帝海西公卽位復臨朝桓温廢海西公太后視奏數行乃曰我本疑此至半便止索筆答奏云未亡人懼此百憂感念存歿心焉如割温始呈詔草慮太后意異悚動流汗見于顏色及詔出温大喜簡文卽位尊后

爲崇德太后及孝武幼冲群臣復請臨朝帝冠歸政
在位凡四十年壽六十一歲崩于顯陽殿謚曰獻
恭帝后褚氏名靈媛陽翟人義興太守爽之女后初
爲瑯琊王妃元熙元年立爲皇后生海鹽富陽公主
及帝禪位于宋降爲零陵王妃宋元嘉十三年崩時
年五十三祔葬冲平陵

南齊

永元皇后褚氏陽翟人

周

宣帝后陳氏名月儀潁川人大將軍山提之第八女
元年選入宮拜爲德妃月餘立爲天方皇后二年二
月改爲天左太皇后三月又詔以坤儀比德土數惟
五四太后外增置天中太皇后一人卽以后充之超
授父上柱國進禹國公除大宗伯見北史

明

徽恭王妃郡人主簿張珂女
公主

漢

陽翟長公主桓帝封順帝第三女脩

北魏

陽翟公主太宗女嫁姚興之子姚黃眉

北齊

陽翟公主神武帝養女韓長鸞嫁典籤燕子獻

列女

魏

辛憲英羊耽妻魏侍中毗之女也其先世自隴西徙陽翟憲英聰明有才識初魏文帝得立爲太子抱毗

項謂之曰辛君知我喜不毗以告憲英憲英嘆曰太子代君主宗廟社稷者也代君不可以不戚主國不可以不惧宜戚而喜何以能久魏其不昌乎弟敞爲大將軍曹爽叅軍宣帝將誅爽因其從魏帝出而閉城門爽司馬魯之率府兵斬關赴爽呼敞同去敞懼問憲英曰天子在外太傅閉城門人云將不利國家于事可得爾乎憲英曰事有不可知然以吾度之太傅殆不得不爾明皇帝臨崩把太傅臂屬以後事此言猶在朝士之耳且曹爽與太傅俱受寄托之任而

獨專權勢于王室不忠于人道不直此舉不過以誅
爽耳敞曰朕則敞無出乎憲英曰安可以不出職守
入之大義也凡人在難猶或恤之爲人執鞭而棄其
事不祥也且爲人任爲人死親昵之職也汝從衆而
已敞遂出宣帝果誅爽事定後敞嘆曰吾不謀于姊
幾不獲于義其後鍾會爲鎮西將軍憲英謂航從子
祐曰鍾士季何故西出祐曰將爲滅蜀也憲英曰會
在事縱恣非持久處下之道吾畏其有他志也及會
將行請其子琇爲參軍憲英憂曰他日吾爲國憂今
日難至吾家矣琇固請于文帝帝不聽憲英謂琇曰
行矣戒之古之君子入則致孝于親出則致節于國
在職思其所司在義思其所立不遺父母憂患而已
軍旅之間可以濟者其惟仁恕乎會至蜀果反琇竟
以全歸祐嘗送錦被憲英嫌其華反而覆之其明鑒
儉約如此泰始五年卒年七十九

荀采潁川荀爽之女南陽陰瑜妻也年十七適陰氏
十九產一女而瑜卒同郡郭奕喪妻爽以采許之因
詐稱病召采采懷刃自誓爽令婢奪其刃扶抱載之

女既到郭氏乃偽為歡悅之色請奕入相見共談奕
敬憚之遂不敢逼至曙而出采令左右辦浴既入室
而掩戶以粉書扉上曰尸還陰陰字未成而縊

元

侯氏曹德妻德病死時元末兵亂侯曰欲守志而亂
離如此其能免乎遂縊墓側

賈氏朱彥良妻元末彥良早逝賈氏年二十二生一
子幼守節奉姑門生瑞草元時旌其門洪武十三年
詔重為建坊嘉靖間州守劉魁題其門曰明時雅重

綱常教勝國猶存貞節門

明

陳扣姐里民陳貢女年十七流寇趙風子率眾趨禹
貢携家入城避之行至西關門已閉賊促至迫女欲
污之女厲聲叱賊怒將盡殺其家口竟不從罵不絕
聲投井自死州守劉魁表其門曰骨肉寧甘鋒刃碎
心肝猶幸井泉知

邵霜兒流賊趙燧等帥眾數萬攻郡城掠食遍四境
女之父母欲携之逃辭曰寧死不野處未幾賊至父

母俱逃賊執女逼汚女厲聲顧罵遂投井中賊復繫
出女竟以汲水磁罐破頭額血淋漓賊怒殺之州守
劉魁旌其門曰井水未能沉璧玉磁瓶猶得破頭顱
楊氏李賀妻嘉靖二年流賊王堂入郡紅暢鎮居民
盡逃西山一日楊歸賊驟至執而欲汚不從懷抱一
子賊先殘害以示威楊執固不從卒遇害後八年州
守劉魁上其事詔旌其門

孫氏劉絙妻絙初爲遼東倉大使坐無妄久獄不拔
氏行乞辦給衣食事得白復爲湖廣巡檢亦貧無所
獲氏又佐之艱苦萬狀僅能歸卒之日家無擔石氏
治棺殮如禮旣殮不食至十一日乃死官師士夫聞
閭男婦往觀如堵詩詞吊者以百計州守殷建申兩
院學道旌表其門

陶氏劉彥深妻深早逝陶年二十八生子八歲陶以
清潔自持奉姑撫子紡織自給父母憐之欲奪其志
陶堅意不從曰姑老子幼安忍他適卒完其節時夏
熟風雹忽至百里之內麥皆摧折惟陶氏麥岐秀無
所傷人皆以爲孝節所感姑李氏壽八十終以禮葬

于祖瑩洪武十七年旌表其門

孟氏王恒禮妻夫早喪孟年二十六守節不嫁紡織爲業奉姑李氏朝夕不怠姑憐其少寡強令適人孟曰姑且老矣使妾適人則姑何以依堅志不從鄉里稱嘆洪武十八年詔表其貞

任氏貢士連浩妻浩年二十七應正統十三年貢景泰二年卒任年三十將縊以殉家人守之親族勸諭以姑老子幼乃不死奉姑孝教子有方享年八十一成化十六年詔表其貞十一年巡撫守道皆獎勵之

喬氏李表妻成化七年表卒喬年二十七長子欽七齡次定一周姑老在堂紡織以養或憐其貧苦諷之嫁誓曰寧餓死不忍背姑棄子以事二姓五十年壽終

裴氏李欽妻宏治三年欽故裴年十七子真在襁褓奉姑撫幼以繼喬志比姑死泣謂真曰吾非姑無以安其室汝非叔何以立其家吾當不媿爲人婦汝可媿爲人子耶四世同居人以爲難州守劉魁上其事未及下代巡沐陽胡公提學方域楊公表其門知州

亦從而題其門曰婦姑一節媿天下之懷二心叔姪同居學壽張之能九世復爲傳以紀其實

劉氏李增妻大學士宇女幼閑家訓知倫理篤禮義及適增善事父母增敬愛之增疾故劉年二十遺孤琇甫二周舅姑憐其少諷之劉曰舅姑所賴者增也今增不幸死妾爲之婦寧死不更適親黨勸之痛哭觸壁流血仆地寡居四十年始終無玷卒塋其舅姑撫琇成立宏治十五年貢于太學鄉人稱之曰養老易立孤難劉固善處節矣正德四年命旌其門

馬氏生員任濟妻濟年二十六卒馬自幼從父文麟任知縣卽洞曉大禮及夫死年二十一子女俱無孝養翁姑雖勢利富貴不足以更其志享年八十有五郡守屢旌其節孝有苦節何曾爲兒女堅心原只重綱常之句畧能稱之

宋氏楊德隆妻陳氏楊德盛妻德隆德盛兄弟俱郡庠名士隆故時宋年二十餘盛故時陳年十七隆止遺一女甫二周盛遺腹子曰師周妯娌互相依倚砥礪誓不更二姓垂五十四年辛苦萬狀鄉里異其雙

節舉于前太守范公未及旌公以陞任去宋陳至今
益顯著焉

李氏陳貢妻東平知州李昇妹也憲治十七年貢卒
李甫二旬欲殉之父母翁姑力勸乃已撫遺女績紡
自給誓不改節州守劉魁表其貞節又題其門聯云
饑餓不忘生死義保全尙賴弟兄賢

李氏太學生馬天常妻天常未三十卒李矢節率僕
婢耕織撫養二孤俱至成立壽八十有九

高氏明生員董萬言妻光祿少卿新鄭高尙賢長女
年二十五萬言卒有子方三月喪出子方週歲俱撫
之成人歷三十五年壽終勅建貞節坊

馬氏生員李紹妻紹故遺子洞甫二歲氏撫孤依父
馬愷爲女紅傭工守節六十餘年壽八十五終巡按
顏旌之且檄行本州優恤其家提學楊亦旌其門

張氏生員薛銳妻年二十六銳故遺女三姑勸更適
卽仰天號哭誓不改節紡織爲業事姑壽終墓埋如
禮撫養三女俱成立清苦六十餘年壽八十七終州
守陳觀衡奉詔表揚之

魏氏生員殷震妻震故氏年三十一誓死靡他辛苦
萬狀清節如一撫孤成立為郡庠名士年七十七卒
劉氏生員朱重輝妻知單縣堅之女輝以疾故劉方
二十五遺孤奎文甫七歲紡織自給撫孤為郡庠名
士壽七十三卒州守祝邦榮旌其門曰柏舟已著共
姜節桂籍應刊孟母門

李氏生員周淮妻年二十喪夫遺孤恭先方數月堅
苦守志誓不他適奉姑壽終撫孤就學壽八十二終
州守張之屏旌之

陳氏故民文學妻陳蒞次女所職所養妹也舉貞節
奉詔旌表

安氏儒士周見龍妻年二十守節始終無議撫孤鳳
瑞入庠州守莫天麒為之申請崇禎十二年得旨表
其貞節

李氏張自強妻守節三十餘年始終無渝知州張國
卿申請旌表按院蘇

國朝知州胡承祖皆表揚之

翟氏婦在天啟間婦失其姓事姑最孝其姑疾將革

婦割股以供之日夜泣禱于神其姑日暝忽張目爲神語曰爾數當盡爲爾婦苦留更延數日果逾數日死人以爲孝感云

董氏孫一鵬妻鵬卒甫二旬生子光周歲卽誓死從夫翁姑父母勸之撫孤皆不聽使人防之越三日乘防者稍疎登樓閉門大言曰夫等着我自縊以殉知州馬協親詣其家吊祭申請旌表詔從之廵道朱公題其門曰風化攸關白首猶難全晚節綱常爲重紅顏不惜死擔當

韓氏舉人陳篤睦妻項城縣丞韓

女篤睦亡卽

誓以死殉或勸止之但曰願與夫一路去耳父兄來吊溫慰再三皆不應一日晨興櫛沐畢登樓閉門侍婢疑其就寢久之壞門入已投繯死矣冠笄衣履皆出新制蓋所謂從容就義者知州許典學申請旌表詔爲監坊

胡氏貢生李繼宣妻闖寇破城入其家將加擄辱氏大罵不屈賊怒亂斫身中八刀而死

安氏生員孫顥師妻闖寇破城擁其家氏有三女長

女年十四惧辱先投井氏大罵賊將次女三女棄之
于井亦隨投井死按院蘇及巡道伍皆旌之

劉氏生員羅啟昌妾昌與鄰生杜芳爲土寇郭景福
所邀堅不入黨景福恨之同被碎割身死劉聞之大
哭入室自縊以殉遺三子繡岳誕皆幼羅妻孫氏曰
我亦殉誰爲夫撫孤耶歷諸艱辛保護備至三子卒
以成立俱入庠知州高良弼旌之時孫氏年八十有
二矣

晉氏王遵義妻義居長諸弟皆賴教訓氏實贊成之
闖寇破城遵義自盡氏亦投繯殉夫

董氏進士董學益之女適昌邑令謝懋賞仲子永祚
祚省親昌邑歸卒于道婦迎其喪長號累日勺水不
入口以死自誓家人共慰解之婦給曰諾乘家人防
少疎闔戶沐浴自縊知府豫章朱公詳其事旌曰從
容就義

劉氏御史劉公調羹孫女也天性孝謹年十七適故
家子儒生連健闖寇陷禹城婦依其姑李氏逃避空
室賊驅令縫紉婦抱其姑大號曰死卽死姑前耳豈

能往受賊辱賊迫以刃婦堅持姑裾不可奪遂遇害
三日家人殮其尸面色如生知府豫章朱公詳其事
旌曰慷慨捐軀有合旌典宜俟題表以備採擇妹京
姑年十餘齡賊到亦墜樓死稱雙烈云

徐氏處士余守德妻德居長兄弟九人成就咸賴之
登第升賢書者四餘俱列黌序實氏內助之力居多
歲辛巳闖賊陷禹城子翰華欲奉母往避他所艱然
曰婦人無老少遇難自當死汝急逃生勿我老人是
念須臾賊至執其子去氏遂投庭前井死

趙淑人叅政陳經濟繼室封淑人工于文辭年七十
餘死國難有傳

王氏生員安允嗣妻嗣博學叔父直指公九域甚器
愛之秋闈未捷憤悒成疾卒氏矢志守節事姑盡孝
訓子有方後闖寇逼城氏曰吾苦節四十年肯見賊
乎先期投井死

郭氏生員陳爾止母逆闖陷城郭氏方抱一孫遂投
井死出其屍尚抱孫如故

連氏婦崇禎末與翁俱爲翟寇所掠以備啖一日屠

畧盡獨婦與翁在群寇復他掠留一寇守家寇令婦理髮婦以目眈翁遂努力摔賊髮仆之翁持賊刀斷其吭時群盜未歸翁欲携婦逃婦曰不可婦行不速徒累翁耳行矣勿婦恤也遂引刀自刎死翁年逾八旬每述之輒流涕

許氏李振世妻賊至白沙氏投井死時十八

劉氏郭能妻能早喪劉二十五居孀五十四年堅節自持撫養孤子各至成立鄉人稱羨之享年八十六歲見五世孫方卒

國朝

李氏儒官王得職妻夫故矢志守節五十四年歷盡艱苦教子成名年八十餘卒按院表其門

任氏義民楊嘉言妻夫故氏方二十七歲矢志守節始終無渝教子成立卒年八十二鄉人稱其貞節郡守李儲龍旌之

唐氏陳應泮妻泮卒氏年二十一誓不改節夫本醫家氏作丸散以糊口仍以囊術授子懷忠子以善醫名氏守節終身按院金巡道王皆旌之

周氏郭世傑妻夫故甫二旬養老撫孤明末茹苦飲
荼歷盡艱辛志節不移奉姑劉氏壽終教子聯科成
人年八十郡守蔡表之九十郡守史表之壽九十四
歲終署州事薛人龍又表之

張氏生員苗時盛之妻許氏其妾也時盛早逝張氏
年二十五子裔振方七歲許氏年二十二子裔繩方
四歲互相依倚養姑撫子誓不再更姑卒盡禮以葬
值明末大亂二氏襁褓二子辛苦萬狀

國朝定鼎教子讀書裔振入庠及孫雨化亦入庠矢志
歷終身如一日張氏壽七十五許氏壽七十七署州
事張公旌其門

王氏秦繼仁妻繼仁幼有名譽早逝氏年二十三孤
身無倚子世臣方二歲經寇亂堅志守節家業得以
保全教子世臣孫文耀俱入庠壽八十卒

楊氏程應元妻應元年十八卒氏方十七歲勵志守
節逾月生遺腹子名加昌辛勤撫養自寇亂至

國朝克守家業年九十餘終加昌年八十餘曾孫滿前
稱盛族焉知州高旌之

朱氏李進綬妻綬早逝氏年二十七子宗林方七歲氏刻志堅守歷寇亂艱苦備嘗迨

國朝定鼎教子成立育孫有方閱五十年始終不逾壽八十五卒知州蔡旌之

張氏羅淳狀妻年二十一值辛巳之變淳狀遇害氏事孀姑撫遺孤艱辛備嘗鼎定姑邵氏壽終盡禮葬之教子爾常人庠壽七十五歲

陳氏羅貢妻貢早逝氏年方二十五遺孤啟旭甫二齡誓死撫孤年九十卒知州高旌之

王氏侯世選妻夫家世耕農氏教子業儒夫故氏年二十八守節不移家貧紡績自給課子雲達以明經歲薦氏年七十七闖寇破城罵賊被殺

趙氏趙履繩女適同里楊敷榮生男一女一年二十三敷榮病篤與婦訣曰我死汝嫁可羞不嫁亦徒苦敷榮死七日而葬婦往送臨其穴卽自投擲衆強扶以歸家人守視垂二十日防少疎卽乘間閉戶自縊死郡守劉國儒請旌異之

生員李延壽妻武氏文風里紅暢集人崇禎末年土

寇亂延壽殉砦死武氏年未二十有子喜方數歲繼
值流寇躡禹喜亦被擄兵荒相仍氏獨守空室艱苦
萬狀堅志不改適順治十八年喜自外歸里母子得
聚鄉里重之舉其節行知州劉爲之請旌表其間曰
志同金石

鍾氏登封人年十七歸郡李有邦仲子猶龍生三子
皆不育閱數歲猶龍游郡庠未幾感疾纏綿日久氏
奉之未嘗有倦色疾革氏值新產不交睫者十日猶
龍每以悞其身爲憾輒誓曰有死而已何悞哉猶龍
死將殉之爲人所覺或勸之曰翁姑固在也氏泣曰
誓之矣且何事我遂仆地昏絕急救之乃甦于是姑
舒容色以給防者明_日朝奠後哭入室自縊時年二
十也登封令王郡太守劉皆旌其門表其墓一時文
人學士爭爲弔挽詩歌累卷帙

陳氏儒士羅啟隆妻隆卒氏年二十五誓從夫死因
有遺腹爲姑勸止逾七月果生子方弱齡值寇亂奉
姑撫幼備極艱苦免于難稱完節焉壽六十四終

陳氏潁川里樊進喜妻年二十八歲進喜死遺子應

大方在韶穉氏食貧守志事舅姑撫藐孤垂四十六
年人無間言知州劉表其門

張氏潁川里民皇甫賓妻賓早世氏年二十八歲矢
志守貞撫二孤至于成立歷四十三年如一日今七
十一歲知州劉旌之

袁氏文風里人父至正有道術知明季將大亂每謂
所親曰時迫矣遂去不知所之氏適同里孫景秀秀
死寇難遺孤九忠方數齡盜賊凶荒展轉流離百苦
備嘗一節自矢垂五十餘年壽八十有四子爲鄉耆

孫列鬻序者二人人以爲貞搦之報云署州事石旌
其門

陳氏儒士朱榮妻榮病死氏方二十一歲事姑舅撫
幼孤苦節三十餘年姑舅沒祭墓如禮郡守于旌其
門曰勁節可風

陳氏王法舜妻翁姑聞闖寇至抱先人神軸祭器投
井死氏急與夫取門板蓋其上以土覆之未畢而賊
入氏先以鉄破其面賊不顧脇其夫去氏追奪之身
首被七刃仆地不能行數日匍匐依母氏居順治二

年夫自陝歸始啟井沒水得遺骸成葬氏生二子而寡時家計草創氏撫孤成立壽九十終杜氏法舜孫珩妻生子二周夫卒氏年二十三今六十五素布寒食勤苦清儉有少壯所不能堪者鄉里欲狀其事于官聞之輒悲泣不食鄉里額其門曰祖孫節義

牛氏儒童王家正妻十九歲夫卒家貧奉事翁姑艱苦倍嘗教子嚴而有法守節五十五年奉旌入祠

王氏生員宋一元妻夫歿氏年二十八紡織奉養翁姑姑病侍湯藥不懈翁姑歿附身附棺盡心焉課二

子成名守節六十餘年壽九十親見五世奉旌入祠相氏儒童郝顯珍妻事孀姑以孝聞二十四歲夫卒族人謀嫁之刺面毀容誓死靡他教子入庠守節四十九年奉旌入祠

靳氏劉琨妻十九歲夫卒孝養翁姑撫孤有方守節三十五年奉旌入祠

張氏貢生羅乾妻十七歲于歸夫入膠庠貢成均皆氏內助之力未幾夫卒養翁姑壽終訓子成名守節三十二年奉旌入祠

晉氏儒士方述振妻年二十一生子未週而夫卒誓
欲殉翁姑抱其子晝夜哀泣乃止夫庶姑王氏出嫡
姑張氏無子二姑異處曲盡孝養倍歷艱辛守節四
十八年奉旌入祠

馬氏生員馬相舜女歸儒童魏嶧二十六而寡事翁
姑撫遺孤以孝慈稱守節四十二年奉旌建坊

李氏秦希英妻年二十九夫卒家貧紡織供翁甘旨
及沒殯墓如禮訓子有方一門六世同居守節三十
五年奉旌入祠

黃氏生員黃山女儒士張振聲妻年二十七夫亡子
亦歿欲自盡殉夫念翁姑年老諸叔年幼矢志守節
家貧紡織供甘旨撫姪輩如已出守節四十五年奉
旌入祠

安氏儒童趙宏欽妻夫卒養老撫孤翁患癱症曲盡
孝養夜設紡具于榻前有呼卽應歷十有二年不懈
翁疾革語人曰吾九泉下必有以報賢婦也守節五
十二年奉旌建坊

王氏王寶妻同里王良知逼姦不從自縊死雍正十

三年奉旌入祠

王烈女吳生兒童養婦也同里王純窺其姑外出入院挑之女惡聲詈之逸去旣而復入逼之女入室閉門純毀門入女脫走投純家井中繫之出至夜自縊死州守上其事奉旌入祠

李氏張連科妻年二十四夫卒翁患癱姑亦失明氏紡織奉養子早亡撫孫成立守節四十七年奉旌建坊

王氏曹用璧妻夫溺水死氏年二十一聞訃投繯以救復甦事舅姑盡孝家無四壁嘗夜紡織雪從屋縫落積肩盈寸訓子務本力農苦節五十一年奉旌入祠

馬氏生員余鑑妻鑑卒養老撫孤守節五十三年署州事石敬旌以巾幗偉人李氏鑑子濟遠妻從祖翰華宦桐栢抵任未一月祖父母與夫俱卒于官氏殯殮如禮時家貲已盡僅扶祖父母柩還里氏痛夫乏嗣又以不能還其柩爲恨終日仰天號泣兩目喪明後立堂姪爲嗣遷夫柩墓祖塋守節三十七年州守

屠用謙旌以金石同盟康氏濟遠從弟潤遠妻何氏
潤遠子杰妻康二十三而寡善事翁姑姑卒獨養翁
二十餘年翁八十二以壽終衣衾棺槨悉出已貲未
幾子早世與媳何氏早作夜息撫孤孫成立守節五
十五年州守屠用謙旌以松筠節搯何更孝謹念姑
孀居每夜伴宿姑年過七十忽患癱症何親侍湯藥
便器皆親持觀色揣情無不曲中今守節三十二年
人稱一門四節奉旌入祠建坊

姜氏儒士王得伸妻二十而寡養老撫孤守節五十
五年奉旌建坊

趙氏監生馬耀妻孝養翁姑撫嗣子季吳成名氏原
籍河朔祖父客死中州無後寄葬兩地氏遷葬父族
十二喪于村南四時拜掃鄉里稱嘆守節三十五年
奉旌建坊

楊氏王斌妻斌卒氏二十四遺腹生子天祐矢志守
志歷五十二年

焦氏儒士趙丕振妻二十二而寡家貧以紡績供翁
姑甘旨撫嗣子爾瞻成立今守節三十二年爾瞻妻

焦氏奉孀姑唯謹夫卒氏年二十四哭絕復蘇家人
互相勸始徐起輟哀既入室移時不出視之已投繯
死矣越二日殮面色如生鄉里莫不嘆異

王氏生員陳璋妻二十六而寡守節三十九年州守
旌其門

賈氏張燭妻二十三夫卒撫姪昇璧爲嗣守節三十
九年

羅氏儒童張作極妻二十夫故嗣姪爲後守節四十
八年年七十六

胡氏儒童李曰偉妻二十五夫卒守節三十四年孝
事孀姑無子嗣伯氏子爲後伯氏卒遺孤五人氏令
子與之同居視如一體鄰里賢之

趙氏魏國儒妻二十九夫卒撫孤成名守節四十六
年年七十五

王氏生員馬相韓妻二十九而寡守節五十四年壽
八十有二州守旌以海州水王

李氏儒童劉訓妻二十而寡事舅姑撫弱息守節四
十三年

連氏巴宏勲妻夫卒時年二十九惟以紡織養老撫孤翁姑歿獨力殯葬不以累諸叔守節四十一年壽七十卒

靳氏李國榮妻二十四夫卒翁老子幼家貧如洗氏竭力奉養翁卒鬻地三畝以葬撫孤成立守節四十九年

谷氏連純妻二十二而寡祖姑年逾九旬遺孤三齡以紡織養老撫幼祖姑歿殯葬如禮遺孤殤又撫嗣子成立守節四十六年

常氏馮瑄妻二十四夫卒養老撫孤歷五十六年艱辛備嘗年八十歲

楊氏儒童冀廷相妻二十二而寡翁姑憐之不責以婦職氏孝養愈篤撫孤禹梅成名守節三十七年州守旌以潔身裕後許氏廷相姪禹貢妻夫卒年二十一守節三十三年

宋氏王忠信妻二十九夫故家赤貧氏租地數畝躬自耕作養老撫孤主者憐之減半收租冬無油燃樹葉紡織達旦不輟苦節五十年州學正旌以節光日

月

范氏毛文龍妻夫爲人佃田病亡氏年三十養育弱弟盡心管家後聞夫家欲嫁之遂刎夫墓側鄉人哀之爲立石表焉

楊氏李昺妻生一子期成而寡或謀嫁之懷刃以死自誓姑馬氏病有餽百花酒者姑飲而甘之遂貸釵以沽姑卒子與媳復亡撫孫孔昭成立守節四十九年州守旌以潔比秋霜

呂氏生員陳作礪妻夫卒氏年二十八事翁姑養葬如禮撫二孤嚴慈兼盡守節四十九年州守旌曰字宙完人

翟氏師有才妻夫卒氏年二十八家貧紡織爲生事翁姑以孝聞翁姑歿竭力營葬親故賻者拒不受守節四十二年

郝氏儒童趙濂妻夫卒氏年十九父母憐之諷改適氏泣曰兒生爲趙氏人死爲趙氏鬼願無復言也事祖父母翁姑克盡孝道撫嗣子以義方守節三十二年

張烈女文風里張集義女幼字賈武武卒自縊有墓
表

晉氏儒童邢大任妻二十一而寡紡織養翁壽終撫
子成立守節五十九年壽八十州守旌曰一片冰心
董氏秦鐸妻二十一夫故紡織養姑自食藜藿姑卒
質次子殯葬後長子成立方贖回今守節三十二年
朱氏董坤妻二十八坤亾撫嗣子成立今守節三十
五年州守旌之

趙氏張文傳妻十九而寡遺孤數月或勸之改適誓
不從晝夜紡織撫子成立今守節四十一年

蘇氏張慊妻年二十四夫卒孝養翁姑撫嗣子成立
守節四十年

楊氏郭景法妻二十九而寡晝夜紡織以奉孀姑撫
四子成立守節五十五年壽八十四

朱氏郭金盤妻二十七夫卒以紡織供翁甘旨翁病
典衣醫治翁歿掩柩草堂每值大風雨輒撫柩哀號
課子含春入庠今守節三十三年

黃氏董濟公妻二十六夫故養姑壽終撫嗣子成立

今守節四十六年

張氏陳錚妻錚卒氏年二十六日勤紡織養翁姑壽終課子照遠成名今守節三十五年州守旌曰苦節成孤

田氏高佳玉妻二十八夫卒今守節四十七年

馬氏高良玉妻二十四夫亾今守節四十九年

楊氏太學生程先正妻二十六而寡孝事翁姑撫孤子成立今守節三十三年

王氏儒童張學海妻二十六而寡孝事翁姑撫嗣子

成立今守節四十八年州守旌以節勁秋霜

孫氏陳其智妻其智卒氏年二十六以紡績養老撫孤歷三十四年胡氏其智子九思妻二十三而寡遺孤未週歲與姑同矢柏舟姑每痛子氏哀勸姑乃少安歷四十四年州守旌以兩世松貞

文氏庠生文玉衡女儒士陳發兆妻也二十二夫卒以紡織養姑壽終撫嗣子成立守節五十年壽七十

三

王氏生員王作肅女儒士康岫妻也岫卒氏年二十

八翁憐其年幼無子勸之改適截髮毀容誓死靡他
養翁姑壽終撫嗣子成立今守節三十六年

李氏周國才妻二十八而寡撫孤子珙列名成均守
節五十年年七十八

許氏楊一邦妻夫卒年十八或謀爲改適氏截一指
誓曰地折山崩吾志不移也撫夫前妻王氏遺孤成
立今守節三十四年

彭氏侯封越妻二十六夫卒上奉姑舅下撫二叔與
孤子成立夫有三喪未葬舅姑歿一力同舉今守節

三十一年

李氏王代妻代卒氏年二十七欲以死殉翁姑抱其
子哀勸乃止今守節三十九年

李氏王傳妻二十五而寡守節四十七年壽七十一
宋氏儒童劉崇仁妻二十六而寡翁患癱侍湯藥十
餘年不懈翁姑歿竭力營葬今守節三十九年

曹氏宋希公妻二十三而寡紡織養老撫孤翁謀嫁
之氏聞泣投井中以救得不死撫姪若已出婚嫁皆
身任之今守節三十七年

閉氏劉琮妻琮卒衰翁在堂遺孤江源江渭俱幼紡績養老撫孤守節六十四年壽九十江源妻王氏二十而寡嗣姪爲後撫若已出守節四十七年江渭妻羅氏生二子夫亾時二十七歲欲以身殉旣念孀姑年邁與源妻王氏同心奉養撫孤子成立守節三十八年州學正旌以三貞繼美

徐氏汪承鈺妻二十五夫卒閨門整肅雖居室淺陋人罕見其面教子定國嚴而有法歲荒出粟二十五石濟饑又撫鄰人孤子王燦成立守節四十八年

柴氏黨揮妻二十而寡家貧紡績養翁姑撫幼子和于娣姒鄰里賢之今守節四十七年

邢氏儒童師溥妻溥卒遺三子李氏溥弟師治妻治卒無子嗣姪爲後娣姒同矢柏舟邢守節五十年李守節三十年人稱一門雙節

王氏郭允中妻楊氏允中弟執中妻兄弟俱卒于康熙五十二年王年二十楊年十九皆無子翁姑憐其年幼勸改適誓不從各取姪承嗣事翁姑撫嗣子食必共噐寢必聯床娣姒和睦歷三十三年鄉里莫不

稱嘆

龔氏閻璪妻守節三十一年楊氏璪弟閻珣妻守節三十年璪卒龔年二十三遺腹生子繼泰珣卒楊年十九無子嗣姪繼隆爲後家素貧紡紉爲業二子恪遵母教竭力耕作家漸豐

王氏生員王靜女年十九歸董至善二十七而寡養老撫孤孤喪嗣姪爲後姪復喪撫弱孫成立苦節五十七年壽八十四

韋氏諸生王膺命妻也年二十夫卒誓以死殉衆慰之曰死節固善奈翁老子幼何始強起營喪事善事翁姑翁明經冕年高重聽先意承志每能得其歡心翁姑歿殯葬皆如禮課子孫讀書督責維嚴子三人仕雲庠生孫四人曾孫十人三登賢書五列膠庠皆有文名壽登九十八卒

羅氏張道妻二十九而寡祖姑劉雙瞽且病委曲承順得其歡心姑姬氏早逝勸翁續娶及事繼姑董氏盡孝無異繼姑卒遺子一週撫之成立守節三十一年三子如鳳入庠

王氏賈秉信妻二十而寡守節三十六年孝事翁姑
撫嗣子成立州守旌其門

馮氏祁邦珍妻二十五夫故姑目雙瞽子七齡以紡
織養老撫孤備歷艱辛守節五十四年七十九

張氏李廷藻妻二十四夫卒養翁姑壽終撫孤子成
立歷三十二年

彭氏生員彭延祀女歸儒童葛好生二十一而寡事
姑恪盡婦道撫二歲之孤至于成立守節四十一年
魏氏徐亮妻二十三夫卒遺孤月餘翁啞姑癡孝事

維謹奉湯藥不懈及卒盡哀盡禮守節四十二年孤
已成立州守旌之

程氏生員徐翼妻二十八而寡養老撫孤歷四十七
年壽七十有五

章氏儒童張文燦妻二十二夫亡欲殉之爲姑勸止
以紡織養老撫孤守節五十七年壽七十三

賈氏吏員賈宏祿女適張廸吉生二子夫卒氏年二
十五數日勺水不入將自盡姑力勸乃已姑患對口
楚甚焚香籲天祈以身代姑旋愈人謂孝感所致守

節三十年二孤成立

張氏李福妻福卒無子氏年二十三事孀姑撫嗣子克勤克儉家漸豐守節四十二年

鍾氏李佩妻夫彌留日不瞑氏料夫以貧故務面誓曰一勤無難事也乃瞑時年二十三今守節三十三年孤已成立

郭氏王得佐妻夫卒氏年二十三孝事孀姑撫姪格爲嗣娶婦焦氏未三載而格故焦氏年二十一與姑相依爲命郭守節三十八年焦守節三十三年稱雙

節云

陳氏張名朝妻二十五而寡上奉翁姑下育子女惟紡織是賴翁姑相繼卒竭力營葬家益落其父養之于家爲置產守節三十三年

張氏項集成妻十九而寡欲自縊翁姑抱孤哀勸乃矢志不二家貧竭力經營漸有起色翁因哭子喪明先意承志每能得其歡心今守節三十五年孤已成立

崔氏儒童關佳玉妻十九而寡孝事翁姑撫二子成

立州守旌以其心如水連氏佳玉仲子哲妻哲卒氏
年二十遺腹生女勸改適不從孀居二十餘年夜不
解衣撫姪爲嗣姑每思子不食輒抱子戲于側必待
其膳而後已姑患泄痢奉事始終不懈守節三十七
年姑八十二壽終子興漢入庠
孫氏朱琦妻二十三而寡子女俱幼紡織以給朝夕
稍長躬率耕作今守節五十三年家業漸豐孫魯繞
膝人以爲苦節之報

雷氏儒童張夢熊妻夫卒氏年二十三守節三十年哀
毀而卒

靳氏儒童曹士振妻夫卒氏年二十六紡織養姑壽
終撫嗣子成立守節三十八年

賈氏王登妻夫卒氏年二十三紡織養翁姑壽終撫
遺腹子成立守節四十四年州守旌之

王烈女鎮峯里民王世臣女幼喪母許字孟天位天
位卒女囑嫂白父兄往吊卽奉舅姑終身父兄不從
未幾更議婚聞之自縊死父兄惡之棄山坡間風吹
木葉蔽其尸如塚狀父兄以爲怪舉火焚之不燃顏

色如生州守率僚屬往祭立石表之

李氏副府李澍女貢生郭瑋子金筠妻也恪執婦道得翁姑歡心夫卒無子遂登樓自縊

張氏牛化麟妻夫卒氏年二十七家貧子幼兄欲謀他適斥不令入門翁病紡織供甘旨自食樹葉野菜一夕姑患風病危甚氏籲天乞以身代尋愈人謂孝感所致守節三十四年子桂林入庠

黃氏王錫侯妻二十而寡家貧紡織奉姑姑老卧床不起躬侍湯藥九年如一日及歿殯殮如禮撫孤成立守節三十七年州守旌以潔身全孝

祝氏白梅妻二十二夫卒無子立姪應庚爲嗣養姑壽終殯葬如禮守節四十年

馮氏王扶妻扶故氏年二十八矢節奉翁姑撫孤成立歷三十餘年

鄭氏徐卓妻卓早喪氏二十四翁姑俱六旬餘子世超甫二歲氏誓守志竭力奉親夜績無油常以樹葉代令子在旁誦讀及長試冠軍今守節四十年

程氏喬梓繼室于歸三載梓故程刻志堅守孝奉翁

姑前子濟民甫四齡育之如已出及長娶李氏七年
濟民故李撫孤守貞與姑同志程以十九歲夫亡李
二十四程守節五十九年李五十一年州守旌其門
吳氏姚氏馮氏皆李婦也吳儒士朝用妻用歿吳年
二十七今守節四十四年姚朝賓妻馮朝棟妻皆用
弟賓歿姚二十九守節三十一年棟歿馮二十三守
節二十九年姚率馮尊吳爲中饋主同志守貞門內
肅如州守旌其門曰一門三節
張氏婁紹文妻年二十五夫故氏堅志守節事舅姑
撫藐孤今歷四十載

趙氏秦永福妻十七而寡取族子克元承嗣念其幼
又取族子爲姑承嗣姑行年八十七趙善事之教子
入成均守節今三十五年州守旌之
丁氏儒士張化鵬妻年二十七夫故氏矢志靡他勤
紡績奉二親姑亡勺水不入口者三日舅病割股以
進守節今三十二年

李氏襄城庠生李清女年十九適潁川里儒士吳得
魁越三歲夫故氏堅志自矢今歷三十二年

楊氏王佩妻年二十六夫故矢節奉病翁及卒殯葬如禮教子樸誠端慤今歷三十一年

任氏賈倫妻年十九夫故無子取姪爲嗣操井白勤紡織養姑壽終守節今四十三年

景氏襄城人潁川里民冀丕臣妻夫歿氏年三十翁瞽姑老子四齡苦志食貧仰事俯育今守節三十八年

吳氏婁琳妻國學生世全母也二十而寡今歷四十三年當夫歿時雙親在堂一子孤弱氏養老撫幼伯叔六人男婦五十餘口四世同居雍如也有告急者必濟之人以爲難

苗氏楊瑜妻年十七瑜故翁姑憐其少又無出欲令改適氏剪髮自誓取嗣子姑病侍湯藥寢食俱廢及歿哭失聲絕而復甦伯叔六人共居善于調停一門和睦今守節三十一年

徐氏年十七適里民張治家赤貧紡織事翁姑年二十一治亡氏養親壽終撫子成立親族至命子候之子或外出則閉門不納其嚴肅如此守節今三十六

年

趙氏儒士燕世煜妻煜故年二十五老姑在堂叔世
 煥尚幼遺孤方在抱家赤貧氏勤紡織仰事俯育世
 煥長為之婚娶遺孤殤取姪以嗣又殤復取宗人子
 嗣今守節三十三年

康氏儒士米若章妻年二十一夫故翁姑既衰一女
 尚幼氏堅志守節奉老親教嗣子勤儉自持歷年四
 十二州守旌其門

袁氏董則和妻庠生袁端女幼習姆訓二十于歸越
 四載和故氏初欲殉或曉之曰汝翁姑老遺孤幼孰
 資俯仰遂苦志守節歷六十一年尚勤儉家業加廓
 人稱女中丈夫學正州守皆旌其門

楊氏儒士康曰琳妻年二十三琳故子詩方五歲家
 赤貧氏晝夜紡績訓子習醫家漸裕今守節四十八
 年州守旌曰撫孤全節

秦氏儒士楊登鰲妻年二十二夫故氏事翁姑育嗣
 子守節今三十七年州守旌其門

王氏王國鼎妻年二十六夫故祖姑及翁姑在堂二

子俱幼氏勤女工以資事育苦節四十八年州守表其門曰三世一身

宋氏于國明妻年十九夫故時祖姑年高翁亦衰邁氏孝奉二老越六載祖姑及翁相繼歿其母勸再適乃自刎不死遂無敢言者守節今五十六年州守旌以完貞全孝里人爲立碣焉

劉氏儒士張又良妻氏年二十六良故劉欲殉七日凡三投繯俱救免家人防益嚴因矢節奉翁姑翁歿姑患癰劉冬同衾夏親扇捧羹饌以身代枕席子建功入庠旋歿劉與媳勤紡織撫三孫成立守節今五十五年州守表其門曰南澗孤松

劉氏庠生鐸女庠生席樸繼室年十八于歸勸夫勤學遂入庠越六載夫亡矢節孝事老姑侍疾數月衣不解帶及歿喪葬如禮前室遺男一女一育之如已出叔湖夫婦俱亡撫姪男女俾成立守節今六十二年

楊氏宋二陽妻年二十七夫故翁亦邁前姑遺二女俱幼繼姑多疾子二長九歲而瞽次方三歲家赤貧

氏勤紡織養生送死嫁小姑教孤子辛苦萬狀門戶
肅清非至親不得至其家守節五十一年

王氏王之儒妻年二十四儒故翁姑俱七旬餘子方
三歲氏矢節今三十九年

馬氏魏秀生妻秀故氏年二十八養翁姑壽終撫孤
成立守節五十四年今八十二歲

張氏儒士趙銓妻銓故氏年十八子三齡父因其家
貧年少諷之他適氏以死自誓親自灌園養翁姑撫
幼稚歷今三十一年

馬氏牛兆麟妻年二十六夫故欲以身殉族姓勸其
養姑撫孤乃強飲食勤紡織守節今三十八年州守
旌曰堅節無瑕

遠氏遠法舜女年十八歸儒士李僕越三月僕故老
翁繼姑在堂夫兄先逝遺二子長三歲次未周氏矢
死守志取夫兄次子治世爲嗣晝夜紡績以供餽粥
繼姑歿季方周歲氏並撫育之苦節四十五年夫兄
長子華忝入庠

侯氏儒士趙文義妻年二十一夫故遺腹兩月生男

孀姑患癱卧床氏紡績侍湯藥及卒遺地三畝賣以營葬撫子成立守節三十四年

程氏程則文女歸連大受爲繼室年二十七夫故翁姑俱邁前室子未成童氏生女二男一俱幼堅志守節勤紡織夜無油藝香照之養親壽終男婚女嫁生孫後兩子及孫皆歿無所依依其二女歷節五十四年中備嘗辛苦行路傷之

劉氏庠生任居易子翰擢妻庠生劉之勃女也幼習閨訓通孝經列女傳年十八歸任善事翁姑得歡心翁姑早逝年二十八夫故氏欲殉不食者三日或勸之乃進飲食勤紡績撫子成立苦節今三十三年

孫氏胡希舜妻年十八夫故遺腹越三月生男未彌月天氏立志守節奉翁姑壽終撫嗣子成立苦節今四十二年

孫氏侑生韓炎妻年十九于歸越七載夫故氏矢志守節事舅姑育二子成立今歷四十三年

原氏原生枝女年十七適王五福八載夫故氏矢志勤紡績翁病侍湯藥數月不解衣歿竭力殯葬姑亦

如之撫幼子成立守節今四十年州守旌其門

喬氏張順妻順故年二十八越十一日生子永成時
翁姑俱六旬多疾氏不憚勤苦冬績紡于月下夏採
樵于日中養生送死教子成立歷三十一年

彭氏楊公選妻十八于歸越十一載選故氏矢志守
貞事翁姑終其天年遺二叔辛苦撫育爲之婚娶歷
四十年

李氏王際聖妻年二十四夫故撫子苦守及長婚娶
行年四十子婦俱亡遺孫七歲紡績撫育州守哀其
癯獨給織機以資其生守節五十年今七十四

蕭氏許州人年十九適鎮定里民姚大化年二十三
夫故氏守節三十二年

樊氏郝繼文妻文故氏年二十九奉八旬老翁壽終
撫五歲弱子入庠守節三十二年

吳氏任國安妻年二十三夫故氏剪髮自誓奉翁姑
撫藐孤今八十歲守節五十八年學正州守皆旌其
門

趙氏都事永寧趙應華之女適守備黃謙之子燕齡

從翁任所婦德最著齡故氏二十九側室蘇氏方十
九並哀慟欲殉以勸慰守節趙率蘇孝奉翁姑教子
成立歷今四十二年學使張公旌曰閨閣儀型

溫氏庠生薛文鐸妻王氏鐸弟庠生文鉞妻鐸故時
溫二十七守節今四十七年鉞故時王二十一守節
四十年學正旌溫氏曰節孝可風訓導旌王氏曰節
堅冰霜

連氏連承舉次女適訓導方穆子維撫年二十六夫
故氏矢志奉親始終無懈州守旌曰節並松筠

宋氏庠生方掄墨妻訓導穆第五子婦也年二十六
掄墨亡氏矢志撫三子皆醇謹季早列膠庠今年八
十矣州守表其門曰操凌冰霜

王氏儒士王兆齊妻陳氏齊嗣子璠妻王二十二夫
故奉病姑衣不解帶者累月及歿殯葬如禮守節六
十三載璠故陳二十六悲慟欲自盡王止之曰昔我
無嗣欲殉若祖姑爲我立嗣若今有子未周若死子
亦死則王氏絕矣陳大悟同心守節撫其子陳事王
亦如王之事其祖姑今七十七

羅氏全文聲妻年二十七夫故氏守節四十一年壽六十八卒

孫氏段光福妻年二十二夫故氏水漿不入口戚族勸曰汝全汝志汝翁汝子無所依賴能瞑目乎乃不死其家有勸改適者持挺逐之不與見嘗念子幼夜不解帶者垂三十載守節五十九年壽八十一

席氏庠生澎女適庠生方廷振子璣一載璣故氏年二十一事孀姑恪執婦道教嗣子錫書弱冠入庠夫妹家貧每出紡績所餘給之處妯娌和睦待諸姪皆
有恩誼守節三十一年

葛氏儒士方維祥妻二十八守節今七十八王氏其長男壽極妻也二十七守節今五十八苗氏其次男昌極妻也十九守節今五十一里人稱之曰姑媳三節

薛氏郝龍妻二十一夫亡姑老多病典衣買藥鬻釵易粟十八年不懈撫育弱子教以耕讀歷五十二年紡織爲業絲粒不忍棄擲鄰婦呼爲勤儉婆

郭氏董作聖妻年二十六夫故孝翁姑撫二子守節

今四十九年

陳氏廩生陳琰女適庠生吳洪訓子雍三載雍故氏年二十二遺孤方周哀慟不食親族勸諭因矢節養二老壽終撫子成立歷五十七年學正旌其門曰冰心一片

劉氏李仕禹妻年十八禹故姑多病子未周氏堅志守節食粗衣單養老撫幼今五十一歲

王氏彭曰謹妻年十六于歸越二載謹故翁姑憐其少諷改適氏以死自誓晝夜紡織孝奉二親取姪承

嗣訓誨成立歷三十年卒

楊氏賈宗顏妻年二十七夫故氏矢節孝事翁姑姑歿殯葬如禮翁失明小心承順撫二男成立守節今三十一年

華氏劉釗妻年二十七夫故氏矢志孝翁姑撫弱子今歷三十九年

張氏包長平妻年十八于歸結褵三載夫故矢節操業紡織事親壽終撫子成立歷六十三年八十三歲卒

晉氏李鳴鳶妻余氏其子中涵妻也鳶故晉二十五
奉親撫孤始終不二今守節五十五年涵故余二十
七與姑同志今守節三十三年

楊氏國學生王佑繼室年十九夫故矢節孝奉翁姑
產遺腹子殤訓嗣子元英入庠撫元配女如已出歷
三十一年

陸氏許州人適鎮定里儒童岳曰梅年十九夫故待
姪爲嗣勤儉自給哭夫喪明守節三十年學院張公
旌曰節高中幘

曹氏胡廷獻妻年二十六夫故夫兄早逝翁病子姪
俱幼親侍湯藥翁歿哀毀骨立姑驟病禱神願以身
代遂愈守節四十五年州守以操潔冰霜旌其門

郭氏儒童馬泰妻泰亡氏年十九欲以身殉或諭之
曰泰無子又先世四喪未葬氏徒死不足以報也乃
不死越二載氏爲立嗣經營四喪畢抱夫遺履自縊
州守邵旌以女中程杵上其事提刑按察使王聞而
旌之曰彤史芳型

張氏庠生張修德女武生吳作乂妻年二十四夫故

氏孝奉舅姑撫二子成立八十歲卒守節五十七年
曹氏里民郭垸妻年二十四夫故姑憐其少諷改適
氏誓不從孝敬彌篤訓子長城入庠守節四十二年
學院張公旌以巾幗清操

趙氏蘓文亮妻二十五守節今歷四十四年州守旌
曰節慰九京

張氏岳玉琦妻二十二夫故今七十二歲守節五十
一年

王氏孫繼先妻二十八而寡事翁姑壽終撫孤子列
名成均守節四十三年年七十一

王氏王舍人女儒士董遜妻二十六夫故一子二女
俱幼欲以身殉伯氏委曲開導始矢志撫孤伯氏故
携其孤往依兩婿孤與兩婿相繼歿氏與二女相依
爲命守節五十一載初夫葬先塋氏苦其遠鬻田四
十畝改葬近地以子士林祔刻石表其墓云

楊氏張珮妻珮故氏年二十四撫三歲孤成立守節
三十二年

孫氏王大年妻十九夫故子甫周矢節今三十八年

州守旌以節孝齊芳

劉氏張奇勲妻勲故氏二十四苦節自守今五十一載

蘓氏朱綬妻綬故氏年二十二翁姑孀子甫三月家赤貧矢志守貞父燦憐其苦節給草室並與棉使績養老撫孤歷五十八載壽七十九

焦氏周琰妻二十三守節至八十一歲卒趙氏焦子婦庠生曰寅母也二十一守節今六十五孫氏焦孫婦也十八守節今五十二學使張公表其門曰二世

貞操

宋氏馬炆妻生員光璧女盧氏訓導相堯長男婦也年十九結褵未三載寡初氏于歸三月姑卽故氏主中饋奉事其舅問食問衣盡心焉舅繼娶杜氏病癰不能起氏晝夜奉湯藥二十年無懈容遺子數歲天俟夫弟次子生取爲嗣年七旬猶習勞不倦學以介節凌霜旌之

姬氏陳伸妻年二十三而寡子孤叔幼姑老氏無所依堅志守節氏舅王某憐甥女寒無衣送棉花二斤

布一疋氏縫紉以奉其姑已仍單衣姑病不欲食氏
跪床前進之勤紡績叔壯而室子長而學皆氏力也
守節四十二年

韓氏汝寧副將桂奇繼室隴西千總復禮女性端惠
識大義年十九適奇奇歷任甘肅濟寧平涼氏內助
稱善及任汝寧未一載病歿無子氏年二十四痛哭
不欲生姑力勸之曰汝忍使汝夫不血食乎且吾老
人何能堪也氏悟乃取姪蘭芳爲嗣竭力事姑今壽
八十餘孫曾滿前州守旌之曰鳳冠幽貞

王氏趙振祚妻年十九于歸越三載夫亡數日不食
及葬投穴中親屬共挽救之已困頓不能興乃以車
載歸猶痛哭不輟翁姑力勸乃節哀以無子請于翁
姑取夫兄次子爲嗣竭力奉事舅姑姑疾朝夕侍側
衣不解帶舅老患癰煎辦湯藥及澣濯衣褥獨任其
勞寡言笑勤紡績嘗積布盈箱任姪輩取之無吝色
嗣子伸有名膠庠守節三十五年

張氏仝治邦妻年二十六而寡一子甫數月姑老家
貧晝夜紡績守節四十五年

李氏武生周步六妻步六故氏年二十七子三齡氏
哀甚欲殉舅姑力勸乃營葬事奉舅姑朝夕不懈舅
姑歿兒亦繼亡氏悲痛不食夫弟生員復勸曰嫂若
死吾兄絕矣且兄固有子豈可使無後氏乃計決取
夫兄次子為嗣為授室得孫今守節三十二年州學
正旌以矢志靡他

王氏李榮宗妻二十四而寡夫臨終以善事翁姑撫
成嗣子為言氏號泣應之卒能不負所天州守以潛
德幽光旌其門

燕氏王來鳳妻年二十八夫歿事舅姑盡婦道訓子
有方子化早入庠守節五十三年壽八十一州守以
陶柳徽音額其門並以一聯旌之

陳氏張璣妻夫病卧床每食先奉翁姑及夫所餘乃
自食或少亦不再炊醫禱無不至氏年二十一夫亡
足不出戶嚴內外勤紡績苦節三十年

任氏張施禮妻二十七而寡子三齡姑八旬癱卧在
床者數年氏晝夜扶持不稍懈守節四十二年

王氏邊起祥妻年二十七夫亡家貧勤于紡績兼以

針指傭工度日歷七十一歲州守旌之曰凌霜勁節
蘇氏李喬昇妻年十九于歸未三載夫亡氏遂投繯
爲嫂氏所覺救免舅姑勸以無後絕夫嗣爲重乃奉
舅姑命取長兄次子甫三月懷抱恩養視如已出迄
于成立現今五十一歲苦節三十年也

張氏儒士趙騰章繼室生員冬生仲男婦也年二十
四夫故一子一女皆元配所遺母以氏無所出使人
諷之氏曰吾有舅可依有子女可撫焉能含垢忍耻
而爲禽獸行耶因以頭搶母懷痛哭不能起母曰吾

姑試汝耳氏遂誓以死守舅年七十餘氏勤紡績以
供甘旨撫子女如已出子婦劉氏素怯弱氏憐之不
遺以勞女旣嫁甚貧氏時時周給之現年五十三歲
矣

薛氏趙士鵬妻結褵三載夫故事翁姑撫幼孤淡泊
自甘守節三十一年州守旌之

李氏蕭廣生妻年十七于歸二十八夫亡守節三十
九年甘貧撫孤戚友周濟悉不受

王氏侯元瑞妻年二十于歸越六載夫病亟囑之曰

吾無子止一女父母在堂汝其善事之氏誓守夫歿
竭力事舅姑舅歿姑老家益貧盡鬻其嫁襦以供饗
殮女怨之氏曰物去還有姑亡可再得乎苦歷四十
二年

張氏張廷聘妻年二十六夫亡投繯以殉嫂氏救免
乃撫其二孤及長子娶婦又亡子婦呂氏年甚幼感
其恩愛亦誓不再適與之相依守節三十年

王氏徐生彩妻結褵八載一子甫三歲夫亡兩月後
又生一子紡織養舅姑撫二子至于白首現年六十
四歲苦節三十八年

張氏庠生王功妻年二十六夫歿哀毀骨立誓同死
親屬咸勸以舅存子幼一死不足了大事乃不死舅
病嘗夜禱于神願以身代病遂愈

溫氏孫正海妻夫死姑早亡翁年八旬並一弱息家
無石儲氏撻作紡績以奉翁撫孤及翁故氏竭力經
營買地一區葬翁及姑與夫苦節五十餘年

田氏趙冬疇妻年二十二夫亡守節五十載
張氏李中樓妻夫亡遺子甫百日老姑在堂家貧氏

奉甘旨得其歡心姑病誓以身代姑卽愈撫子長入
成均儒學旌之曰松心筠節

李氏王全中妻結褵八載夫亡家貧紡績事翁姑姑
病賣奩具奉湯藥及翁姑終殯葬如禮親申助以金
辭不受守節四十五年

王氏聶印妻二十六夫亡遺孤甫周歲奉事翁姑養
老送終苦歷三十二年學使林 以艱貞垂範旌之

胡氏儒童許忠良妻生員胡忱女也性淑慎年十八
于歸越四載忠良故氏欲爲夫立嗣無其人越六年

而後得仲弟仲子孝思爲嗣方三歲愛如已出甫冠
又歿越數年得孝思兄子承泗爲孝思嗣亦三歲撫
之如撫嗣子初翁病垂十餘年氏慇懃奉湯藥翁歿
祖姑及姑在堂諸姪幼弱上下衣履飲食皆氏經營
不以諉諸弟婦生平無喧笑聲足不出中門年踰六
旬猶操持如故

連氏監生郝秉禮妻于歸四載夫亡氏年二十三守
節三十五載儒學王 旌之

趙氏王丕謨妻庠生趙從龍女也年十八于歸十九

夫亡產遺腹子辛苦撫育孝事垂白翁姑無米而炊
十指拮据不以貧苦移志翁姑歿氏力營墓如禮州
學正以貞節匾其門作詩讚之嗣子成立諸孫蔚起
壽六十一卒

王氏米從仁妻兄弟三人從仁早亡無子惟一女翁
姑憐之勸其改適氏痛哭自誓矢志靡他既而仲弟
從義亡遺一子甫五歲季弟從禮又亡遺一子甫二
歲從義妻劉氏從禮妻李氏感王堅貞同心守節養
生送死撫孤婚嫁悉出三孀紡績之力從禮子燦娶

相氏甫一載燦亡無所出取別枝爲嗣從義子箱娶
楊氏箱十九亡遺一子方數月相氏與楊氏感其姑
之孀也復誓死三孀俱年屆七旬兩婦亦五十餘白
首皤然一門完節

趙氏李國輔妻性醇謹事翁姑克盡婦道二十五寡
遺一子維學僅二歲比長娶孫氏貢生逢吉女甫入
門姑寢疾在床氏主中饋奉事病姑並事祖母未幾
維學亡孫氏年二十一姑老而病子甫周歲孤苦零
丁始依其從兄某繼依其堂兄某及趙氏故氏以禮

墓守節四十餘年克繼其姑云

劉氏朱廷沂妻十七于歸一載夫歿墓時氏哀號欲投穴中不獲歸輒自縊家人急救免母家屢勸其改適氏堅不從擇姪爲嗣迄于成立守節三十三年今行年五十一

方氏儒童朱大猷妻大猷病故氏卽投繯姑救之得免時年十七無所出請于舅姑取長兄次子爲嗣撫育教訓紡績十餘年積布二百餘疋及翁姑歿盡出其布與夫兄曰父母在伯事之今墓我出此以代夫子事也守節三十八年今行年五十四

安氏王右恭妻年二十六寡翁因喪子得疾氏默禱于神姑知之以告翁翁喜疾遂愈氏夫歿五月後產一子氏誓曰此子若不成人吾一死謝夫耳子長延師教訓迄能成立守節四十年

趙氏儒童邢士珍妻睢州學正冬旦女也幼嫻閨訓明大義年二十于歸二十四而寡孀居四十載士珍堂弟士義妻徐氏生員士芳女年十九于歸二十寡孀居二十六載

薛氏董曰善妻二十一寡家貧鬻粧奩葬夫舅病氏
禱神而愈姑病思肉食氏欲割己肉以進姑聞急止
之族兄某欲奪其志氏置之絕其往來撫四歲孤子
成立守節三十四年

郭氏朱龍彩妻年二十六夫歿欲以身殉姑勸止姑
年老氏卮養備至食必以肉進寢必以身試姑壽百
歲皆郭氏支門之力守節三十年

徐氏冀乃命妻早寡子甫三歲善事老姑姑壽至百
歲歿撫孤授室得孫而子婦並亡氏復撫孫成家壽
八十三歿州守旌之曰惟貞者壽

張氏冀鼎成妻年十九夫亡翁姑在堂堅志不二守
節四十四年州守旌之曰操同冰雪

蕭氏冀鼎錫妻二十二夫亡子甫二歲善事翁姑夫
兄三人同爨四十年妯娌和睦無間言

席氏王永妻永父母早亡賴伯母撫育結褵三載氏
年十七夫亡亡後產一男氏竭力事伯母撫幼孤成
立行年八十

連氏湖廣鄖西知縣趙士毅繼室生員連琳女性淑

靜工女紅士毅弱冠領鄉薦中年乏嗣繼娶氏生一子氏協和側室孫氏再舉次子士毅筮仕柳城以憂歸囊空如洗氏出紡紝所積舉葬事裕如也後士毅補郎西令卒于官氏年二十九孫氏年二十五淡泊自甘益勤操作撫二子氏七十七卒孫氏今壽至七十七一亡一存各稱完節州守旌之曰雙節爭輝燕氏郭九錫妻二十二寡取夫兄子爲嗣善事翁姑姑患癱不能言氏觀色揣情無不曲中奉侍三載旣而翁亦卧病不能起氏奉湯藥如事姑守節三十二年

劉氏魏國俊妻年二十七夫亡守節三十七年夫在日兄弟已析居及夫歿子甫五月氏抱兒泣兄前曰願仍合爨凡所有不敢私遂復同居如初

李氏王振傳妻二十一寡子二歲立志堅守歷年七十守節四十九年

杜氏楊睿妻夫亡年二十撫子玉祥以事孀姑守貞不二晝夜勤苦納婦王氏未三載玉祥又亡鄉人憐之今六十三守節四十餘年

鍾氏靳智妻二十六歲夫亡善事舅姑家貧寒冬衣
單其兄送米及綿衣二襲氏以棉衣衣其舅姑已仍
單衣歲潦水大至村人皆奔土阜氏負姑隨之賴以
免今六十七

馬氏連九經妻年二十三夫亡氏投井中急救免氏
遂立志養舅姑撫一歲子及姑老日育齒落氏每以
甘軟進得其歡心今氏年七十七

白氏李坤妻二十八夫亡守節歷四十六年

張氏董九璽妻生二子早年夫亡欲殉舅姑苦勸乃
奉舅姑撫二子遭歲荒艱食翁姑諷使嫁堅志不移
守節四十七年州守旌之曰苦節能貞

朱氏王宗閔妻二十七夫亡姑多病氏勤紡績奉藥
調護姑得享高年教子入庠食餼守節四十三年
陳氏魏天倫妻年十八于歸甫三月夫亡氏矢志靡
他歷年六十六歲

王氏連珠妻年二十寡養翁姑撫孤兒守節三十二
載

王氏陳璋妻年二十六夫亡欲殉翁姑勸而止守節

三十八年乾隆二年學使張旌之曰節孝勵俗

蔡氏曹玉寶妻年十八于歸越十載夫亡家貧親事耕作舅年邁龍鍾姑雙瞽氏奉養無失守節四十三年州守旌之

安氏李維屏妻康氏維璧繼室娣姒也夫亡時安年二十四康年二十六皆孀姑在堂安氏守節七十二年今行年九十五州守旌之康氏撫前妻遺子如己子次子早亡撫二孫子婦婁氏亦相依十八年氏守節四十二年今行年六十八周氏維屏姪仙品妻也二十八而寡取姪光時嗣伯嫂歿撫養其幼子女婚嫁悉氏力今行年六十八

劉氏崔露妻二十三夫故今五十四楚氏露弟雯妻二十夫故今五十二一門雙節里人稱之

席氏生員楊秉溫子登龍妻年十七于歸十九夫亡無子堅志守節踰十年夫弟生子取爲嗣以育以教事祖姑及翁姑恭敬有禮州守旌之曰心如金石今六十三

許氏郭吉妻二十六夫故舅姑皆歿又鮮兄弟遺腹

生一子家無寸土勤紡織堅志撫育今五十九苦節
三十三年

劉氏魏允升妻年十六于歸二十二夫亡守節五十
一年

張氏庠生張蓋女年十九適庠生王績之子廷棟結
褻五載廷棟故氏苦志守節歷五十一年州守學正
皆旌其門

張氏庠生張虎文女文風里民朱應輝妻庠生擢之
祖母也當順治三年其母夢太湖石墜懷驚而生氏
因惡之棄于野犬啣草以覆且守焉牧童以告遂收
養于家年十九歸輝勤紡織供甘旨得翁姑歡爲少
弟納婦甚和睦夫兄弟力田行饁相敬如賓生八男
孫二十九曾孫二十一元孫七夫先歿五世一堂內

政肅雍行年百歲里人上其事于州州守署曰際
景運之方隆鍾坤輿之間氣百齡壽婦實

盛世之休徵千載貽徽侯援例而上達

董氏朱茂時妻五歲遭流寇亂父母携逃三峰山事
急偶相遺及寇退氏自還家手握長毛數莖狀若虎

鬚家人驚異入齒舉家爲土寇所俘氏跪泣哀懇賊
義之得俱釋比于歸善事舅姑承望顏色舅姑病禱
神願以身代病輒愈及歿家貧不能具棺賣粧資以
勤事性勤儉力紡織撫子孫視其材各授一業習誦
讀者挑燈親督之諸孫端及際辛皆入庠曾孫滿前
壽一百一歲乾隆二年建坊

賜上用緞一疋內府銀十兩

胡氏生員振女生員趙冬生季男騰冠妻也幼嫻家
訓識大義騰冠中年亡姑早歿三子幼舅七十餘氏
朝夕定省不懈家素貧茹糲營甘旨及舅歿勤紡
織不輟以營葬事弗給則鬻產以辦教三子嚴而有
法每夜績令誦讀其側小有過撻不貸長子健登賢
書季子价入庠鄉黨賢之

董氏生員劉國定子之何妻氏幼慧七歲時每父自
塾歸奉飲食甚恭暇卽向父問字通小學孝經及文
公家禮年十四歸劉有舉案風初失愛于舅姑事益
謹舅姑悟極愛憐之及舅歿姑老且病方隆冬姑思
食麩麩氏以麥子製進與新無異復思新樹蛾衆方

難之氏命子誠心以求竟得之姑病遂愈姪婦歿遺
嬰方一月將委諸他姓氏命子婦乳之至成立所著
勸俗法言及體心家訓藏于家晚年子孫內外七十
餘人卒年八十六

王氏李文魁妻生于順治元年雍正八年年八十
詔賜帑緞壽服乾隆八年壽百歲卒

禹州志卷之八終

